

# In gir tras il Grischun

«Cuntrasts» da la Televisiun Rumantscha sin DVD, part 1

## Cunfins cun foras – Schengen ed il Grischun

Il cunfin dal Grischun cun l'Uniu europeica è lung. La Svizra n'è betg commembra da l'UE, ma dapi ils 12 da december 2008 commembra da la Cunvegna da Schengen. Mida quai insatge als cunfins grischuns? Arnold Rauch è stà a guardar sin quatter differents cunfins, a Castasegna, a l'eroport da Samedan, a la Drossa Livignio ed a Martina. Tuts quatter passagis da cunfin èn confruntads cun Schengen, ma a moda fitg differenta. (Emissiun dal prim da mars 2009, redacziun: Arnold Rauch).

## Vnà – in vitg, in hotel. Istorgia d'in project turistic

In project turistic cun caracter da model sveglia emozziuns. Il project «in vitg, in hotel» duess manar nova vita a Vnà ch'è ina fracziun da la vischnanca da Ramosch. Per ils iniziants èsi svelt cler ch'ina dess betg vegnir fabricata in hotel exclusiv nov.



Ins vulesse durar substantia existentia. L'idea d'in hotel decentral è naschida. La veglia ustaria «Piz Tschütta» è il cor dal project, in hotel cun tschintg chombras. Ulteriuras chombras vegnan dadas a fit en chasas privatas en il vitg. La Televisiun Rumantscha ha persequità durant ils ultims quatter onns il svilup dal project fin a l'avertura da l'hotel decentral l'emprim da matg 2008. Iniziants, abitants e politichers prendan posiziun e din tge ch'els pensan dal project. (Emissiun dals 4 da matg 2008, redacziun: Susanna Fanzun).

## «Guarda – oz sun jau qua da chasa»

Chasas vidas, personas veglias ed adina pli paucs uffants. Cun questa situaziun eran confruntads ils abitants e las abitantas da Guarda ils onns 1990. Per evitar che la scola vegnia serrada, han ils da Guarda mess tut en moviment per che famiglias cun uffants vegnian ad abitar en il vitg da muntogna. Entaifer tschintg onns èn arrivadas ogt famiglias novas per abitar a Guarda. Las famiglias èn vegnidadas retschavidas cun bratscha averta. Ellas èn vegnidadas cun uffants, ma er cun autras ideas e modas da viver. Igl aveva dà ina vaira revoluziun en il vitg. Oz, passa 20 onns pli tard, ha Susanna Fanzun, l'autura dal film, dumandà co che l'integraziun haja funcziunà. Il film è ina documentaziun davart curaschi, idealissem ed il spiert dals onns 1990. Igl è er in film davart il nov sco schanza e da la tema dal nov. (Emissiun dals 29 da matg 2011, redacziun: Arnold Rauch).

## Quels da Lü – in film da Bruno Moll

Il 1992 è Lü vegnì enconuschent sin plaun nazional: tut ils 39 votants e vo-



Vnà en l'Engiadina Bassa.

FOTO: CC BY-SA 3.0 / ACONCAGUA

tantas ch'èn stads a l'urna han ditg na al Spazi economic europeic. Dapi lura vala Lü sco bastiun cunter tut ils chastellans esters pussaivels. Il chau da la PPS – Christoph Blocher – è burgais d'onur da Lü. Il cineast liber Bruno Moll ha realisà in purtret sur da Lü e ses abitants. L'autur enconuscheva Lü mo dal num ed or da las medias. (Emissiun dals 22 da favrer 2009, redacziun: Bruno Moll).

## Da vender: chasa engiadinaisa

La bellezza e la glischur da l'Engiadina'Ota attira ils giasts da l'entir mund. Ils giasts vegnan per sa recrear e pli er per cumprà immobiglias. L'interess per chasas engiadinaisas è fitg grond. Questas chasas istoricas valian ozendi en l'Engiadina'Ota milliuns. Lur auta valur è in problem. Ils indigens na pon betg pli sa prestar ina, e sch'i han ina, è la tentaziun da vender quella per in pèr milliuns gronda. Sco viva e surviva la populaziun indigena en quest flatg dal mund uschè exclusiv? Il film da Susanna Fanzun mussa la sort da trais chasas e da lur abitants en il vitg da La Punt Chamuesch en l'Engiadina'Ota. A pled vegnan Riet e Renate Planta-Pfister, Luzius Oberer, Paulin e Margret Nuotclà-Stocker ed il professer d'architectura Valentin Bearth. (Emissiun dals 28 da favrer 2010, redacziun: Susanna Fanzun).

## Mulegns – «cò nign tgi ferma»

Mulegns è la pli pitschna vischnanca politica en noss chantun. In vitget sin via vers il Pass dal Güglia cun suletmain 26 abitants. Ed er sch'igl è mo in vitget, Mulegns tut ch'enconuscha – forse betg gist il vitg sez, dentant franc la stretga tras il vitg. Là nua che chauffeurs

zerclan e camiuns sgaran vi da las fatschadas da las chasas. Quai enconuscheva er Eligi Derungs, ma el vuleva savair dapli da Mulegns. Tge datti qua? Tgi viva en quest vitg e co viv'ins qua? Perquai è l'autur stà per in'emna a Mulegns. (Emissiun dals 17 da mars 2013, redacziun: Eligi Derungs).

## Café, benzina e tualetta – pausadi Viamala

24 uras pausa sin il pausadi. Venderdi avant Tschuncaisma è in'equipa da Radiotelevisiun Svizra Rumantscha sa fermada sin il pausadi Viamala a Tusaun. Betg per baiver in café, betg per tancar u ir svelt sin tualetta. Na, nosa equipa ha realisà ina reportascha da 24 uras en il lieu. «Tgi vegn qua?» – «Tgi lavura qua sin il pausadi e tge capita durant 24 uras qua a l'ur da l'autovia A13?» Ina reportascha cun bleras e spezialas sentupadas. (Emissiun dals 28 da zercladur 2015, redacziun: Eligi Derungs).

## Cuira vest – Go west

La citad da Cuira ha gronds plans. En il vest duess nascher en ils proxims 15 onns ina nova part da la citad. Ins vul investir ina milliarda francs, surtot en bajetgs auts. 6900 personas duain viver da nov a Cuira Vest. Il film mussa co che la citad da Cuira, investiturs, possessurs da terren e planisaders na vegnan betg perina tgenina ch'è la dretga via da planisar il nov quartier. En il medem mument sa fatschentan ils abitants da Cuira Vest cun la dumonda schebain els han in avegnir en il nov Cuira Vest u betg. (Emissiun dals 12 da schaner 2014, redacziun: Petra Rothmund).

## Marchesa – il siemi d'abitar

Dadens Domat sin in prà verd è vegnì bajegià entaifer 10 onns in quartier nov: 200 chasas sin ina surfatscha gronda sco 27 piazzas da ballape. Tgi che va cun il tren da Domat vers La Punt (Reichenau) vesa da vart sanestra las chasas giaglias. Surtut famiglias giuvnas han realisà lur siemi da l'agen dachasa. En ses film «Marchesa – il siemi d'abitar» mussa Herli Bundi co ch'ils piuniers dal quartier èn sa drizzads en. Tge èn stadas las raschuns per quel u l'auter architect? Co han las famiglias chattà il stil da lur chasa e co sa sentan els en il ravugl dals vischins? Enturn la Tuma Marchesa flurescha in microcosmos, ina pitschna oasa a l'ur da la Rumantschia. (Emissiun dals 26 da zercladur 2011, redacziun: Herli Bundi).

## «Salums – insla dals beads?»

Salums è in aclaun che tutga tar la vischnanca da Laax. Fin ils onns 1960 in lieu

ruassavel, idillic e sulegliv amez il guaud «Uaul grond» cun ina survista magnifica sur la Foppa. Oz è Salums in vitg cun passa 200 abitaziuns, villas e residenzas da vacanzas. Ma tgi abitava en quest lieu avant ch'ils turists èn vegnids? Sch'ils indigens discurran oz da Salums, lura sa regordan els bain spert da l'eremit «Tesli», il Mathias Cavelti ch'aveva chattà là sia pasch, dals dus originals Sep e Toni Burkhardt ch'han passentà l'entira vita en l'aclaun, da l'artist Carl Strauss che simpatisava – uschia vegni raquintà – cun ils nazionalsocialists e da la famiglia da Turitg ch'aveva cumprà avant passa 50 onns l'Isola Beata, ina chasa da la quala nagin indigen na saveva propi tge che capitava davos ses mirs. (Emissiun dals 8 da favrer 2015, redacziun: Eligi Derungs).

## Vanescha – «Pli gitg ch'ins stat e pli gitg ch'ins stess»

Eligi Derungs (1960–2016) aveva in dun da tschiffar pitschnas muments filmics che restan, pitschnas scenas che raquintan las istorgias las pli impurtantas da la vita, scenas che van a cor. Sco las istorgias che capitavan a Vanescha – ina culegna isolada entadim la Val Lumnezia. Sur in onn ha Eligi Derungs adina puspè filmà quest lieu solitari. Ed er sche nagin n'abitescha qua sur onn, viva Vanescha. (Emissiun dals 22 da schaner 2012, redacziun: Eligi Derungs).

## I va schon – anc

I vegn pli e pli quiet en ils aclauns e las fracziuns. Ils giuvens han bandunà, u stuì bandunar la val, quels ch'èn restads èn oz pensiunads e per gronda part en in'auta vegliadetgna. Sche quels n'èn ina giada betg pli, lura datti mo pli chasas da vacanzas en quels lieus solitaris. L'entschatta da mars ha Eligi Derungs visità ils aclauns da Drual en la Val Medel e da Sogn Andriu en la Val Lumnezia. El ha vulì savair tgi che viva insumma anc en quests aclauns solitaris e co ch'igl è da viver là. (Emissiun dals 18 d'avrigl 2010, redacziun: Eligi Derungs).

## Vrin: in vitg auter che tschels

Entadim la Lumnezia èsi capità ils davos onns ina pitschna miracla. La vischnanca da Vrin è daventada in lieu da pelegrinadi per amaters d'architectura da l'entir mund. Vrin mussa, co ch'ins po mantegnair e sviluppar in vitg senza destruir sia struttura tradiziunala. Vrin vul segir ses avegnir sco lieu per viver e lavurar. E tschertga perquai in'atgna via, nua che l'architectura e l'economia van a pèr. (Emissiun dals 27 da mars 2011, part da la seria «Construir la Svizra»).

## Il mitus da la Greina

Dapi tschientaners dat la Greina da discutar. Pli baud sa dispitavan Grischuns e Tessinais pervi da las pastgiras, suenter hai dà vivas discussiuns pervi da las auas e la forza idraulica. Oz debattan politichers, purs, chatschaders, activists e poets en tge moda ch'i saja da proteger la Greina. I dat numerusas istorgias e legends davart questa planira alpina tranter nord e sid – la Greina è in mitus. La Televisiun Rumantscha e la Televisiun da la Svizra taliana TSI han fatg in film communabel che mussa co che la Greina è daventada quest mitus. (Emissiun dals 4 da schaner 2009, redacziun: Michelangelo Gandolfi / Peter Kreiliger).

## «Adia Sontga Maria»

Il num Soliva è prest mo pli istorgia per l'ospizi Sontga Maria sin il Pass dal Lucmagn. La famiglia Gion e Gabriela Lutz-Soliva è sa decidida da chalar e da vender ses ospizi sin il Pass dal Lucmagn. Betg simpel per els, sch'ins sa che l'ospizi vegn manà dapi 135 onns da la famiglia Soliva. Già l'urur da Gabriela Lutz-Soliva vegniva la stad sin il pass per manar l'albiert. Da lez temp possedeve la claustra da Mustér l'ospizi. Avant 20 onns han Gabriela Lutz-Soliva e ses um cumprà quest ospizi. Els lavuran tschintg mais e quai set dis l'emna sin il pass. Uss vulan els chalar. Lur trais uffants na vulan u na pon betg cuntinuar cun la tradiziun da famiglia. Uschia che Gabriela e Gion Lutz ston, gugent u navidas, vender l'ospizi e prender cumià da lur Sontga Maria. L'era Soliva va a fin. (Emissiun dals 12 da matg 2013, redacziun: Eligi Derungs).

## Il Pass dal Lucmagn – maridaglias tranter nord e sid

Il Pass dal Lucmagn è la pli bassa transversala dal nord al sid en las Alps. El collia il Tessin cun il Grischun, la Val dal Blegn cun la Surselva. Ils Blegnais ed ils Sursilvans han adina fatg commerzi in cun l'auter, els èn sa dispitads e cumbattids, ed adina puspè sa cunvegna. Igl ha dà patgs, contracts e maridaglias, fin oz. Il film mussa l'istorgia dal Pass dal Lucmagn. El mussa er duas letgs en il temp dad oz, nua che la dunna deriva mintgamai da l'autra vart dal pass. Co èn ils Blegnais e co ils Sursilvans, e tge collia els auter che la via dal pass? (Emissiun dals 4 da november 2007, redacziun: Peter Kreiliger).

## Nua è la funtauna dal Rain propi?

Sch'ins discurra da la funtauna dal Rain, lura pensan ils normalmain al Lai da Tuma. Quels da Tujetsch dovran oz il Lai da Tuma sco messadi principal per lur regiun turistica. Betg tuts èn dentant da l'opiniun ch'il Lai da Tuma saja la vaira tagna dal Rain. Uschia er Eric Schmid da Glion. Per sia lavur da matura al gimnasi a Mustér ha Schmid retschertgà l'istorgia da la funtauna dal Rain. Sia conclusion: La vaira funtauna dal Rain sa chatta sium la Val Cadlimo tar il Lago di Dentro, la distanza da qua enfin la sbuccada dal Rain a Rotterdam è numnadama la pli lunga. Il flum che cumenza qua ha cumenzà oz Rain da Medel, il territori da la funtauna tutga a la vischnanca da Quinto en il chantun Tessin. Pli baud sa numnava quest bratsch dal flum anc Rain Mesaun. (Emissiun dals 4 da settember 2011).

## La preschentaziun:

«Cuntrasts» da la Televisiun Rumantscha: Films emess ils onns 2007–2015, accessibels en la Biblioteca chantunala en format DVD.

## Dapli infurmaziuns:

chatta.ch/?hiid=4733  
www.chattà.ch



La Greina entadim la Val Sumvitg.

FOTO: CC BY-SA 4.0 / WHGLER